

## REGIONAL NEWS

HEADLINES:-

1. Lai Autonomous District Council ah Congress leh MNF Party thawkdunin sorkar an siam dawn.
2. MLA Pu Rasik Mohan Chakmachuan Dan hriat loh vangin mi dik te hmuh dik lohin an awm thin a, dan hriat hmasak a zirchian a tul takzet a ni a ti.
3. Lok Sabha inthlan thawh lina atana campaign in a vawrtawp a thleng chho tan.
4. President Draupadi Murmu-i chuan zaninah civil mite chawimawina Padma Award a sem dawn

&lt;&gt;&lt;&gt;&lt;&gt;

LADC

Lai Autonomous District Council ah Congress leh MNF Party thawkdunin sorkar an siam dawn a,

LADC a Chief Executive Member atan South Lungpher bialtu Congress MDC, Pu C.Lalmuanthanga Governor in a pawmna lehkha vawiin khan tihchhuah a ni.

Thlahnih vel LADC ah Sorkar mumal a awm loh avangin Governor in enkawl lailawk turin Lawngtlai DC a ruat a, Sorkar thar a pian dawn takah hian hun remchang hmasaber ah Chief Executive Member thar tur hi Lawngtlai DC in rinawmna thu tiamtirin a lalut anga, Governor in ruahmanna a siam lawk angin CEM thar rintawkna hi May 20 ah LADC Session ah neih a ni ang.

Puan tawh thin angin LADC a MNF Legislature Party Pu V.Zirsanga kaihruai Sorkar chu MDC 13 ten Governor hnenah thlawptu a ngah tawklo tih an thlen hnu ah, Governor in Pu V.Zirsanga chuan thlawptu a neihdan fiah tura Floor Test nei tura March 7 a a tih laiin LADC Session neih hma lawkin Pu V.Zirsanga chuan CEM atangin banna a thelut a ni. Heta tang hian LADC ah Sorkar mumal a dinh theilo a, hemi hnu hian Congress MDC 1 leh MNF MDC 12 ten United Legislature Party, Congress Member Pu C.Lalmuanthanga kaihruaina hnuaiah dinin, May ni 1 khan LADC ah Sorkarna an siamthei tih Governor hnenah Caretaker Lawngtlai DC kaltlangin an thlena, he thu kalzelah hian Chief Executive Member atan Governor in Pu C.Lalmuanthanga a pawmna chu vawiin khan tihchhuah a ni ta a ni.

&lt;&gt;&lt;&gt;&lt;&gt;

CM

Vawiin khan Chief Minister Pu Lalduhoma, Finance Minister ni bawh hovin a pisaah 16th Finance Commission hnena rawtna thlen tur relin mi pawimawh te an thukhawm.

Vawiin thutkhawmah hian kum 5 chhunga Mizoram sawrkar sum hmuhna leh hmanralna te, leiba neih dan leh rulh dan te, kum nga hma lama mi te pawh uluk taka zirho a ni a. Chumi hnuaah kum 2026 April ni khat atanga hman tan tur

Central leh State te sum insem dan duangtu tur 16th Finance Commission hnenah thlen tur rawtna te an duang tan a ni.

Hmasawna inkhairual leh mitin huapzo a awm theih nan rawtna hi uluk taka duan ni se tiin an rel a. A tul ang zela la thutkhawm leh an tum bawk a ni.

<><><>

### RM CHAKMA

MLA Pu Rasik Mohan Chakma, Chakma Autonomous District Council CEM ni bawk chuan Dan hriat loh vangin mi dik te hmuh dik lohin an awm thin a, dan hriat hmasak a zirchian a tul takzet a ni a ti.

MLA leh CADC-a CEM hna a chelhkawp chungchanga office of profit laa puhnaah dan a bawhchhiat loh thu nimin khan Governor chuan hriattirna a chhuah a, hemi chungchangah hian vawiin khan Aizawla Press Club-ah thuthar thehdarhtute kawmin Election Commission of India (ECI) in dan a sawifiah takah chuan mipuiin rilru dik an put theih nan thudik puanchhuah a ngai a ni, a ti.

Office of profit chungchangah hian hman a\ang tawhin ngaih dan fuh lo a awm a, a case chungchanga ECI thutlukna chuan mipui zirtir se a duh tih a sawi a, Mizoram Assembly dan lo siam ve hmangin office of profit chungchangah MLA te ban theih angin Law Deptt pawhin "Dan bawhchhia, disqualify theih" angin Governor ah an thlirdan an thelut ni a a hriat thu sawiin tun hnuah chuan dan zir chiang tawh \hin se, office of profit chungchang a High court judgement lo awm tawh te leh ECI ngaihdan lo puanchhuah tawh te zir chiang lovin observation siam tawh lo se a duh tih a sawi a ni.

Sixth Schedule hnuai ADC a MDC/CEM post te chu India Dan pui hnuai office of profit a nih loh avangin MLA nen a nih kawpin office of profit dan an bawhchhe lo a. CEM hna a thawh avangin CEM hlawh a la thianga, MLA hna a thawh avangin MLA hlawh pawh a la thianga, thawhhlawh chu a la tur reng a ni a ti.

Pu Rasik Mohan Chakma chuan Hachhek bialtu MLA, Pu Robert Romawia Royte pawh ZPM Party in a fapa in sorkara contract a thawh avanga 'office of profit' dan bawhchhiaa an puhna pawh dan bawhchhia a ni lo tih ECI in an nemngheh tawh thu a sawi a. Dan hriat loh avangin mi dik te hmuh diklohin an awm thin tih sawiin mipui leh party pawhin dan an hriat loh avangin mi chungah ngaihdan dik lo neih palh theih a nih thu a sawi a ni.

<><><>

### M LALMANZUALA

Mizo Zirlai Pawl MZP in MPSC hnuai, Mizoram Combined Competitive Examination leh ACF hna lak dan a thil fello awm ni a an puh chungchang chhui tura sorkarin a ruat, Inquiry Officer Pu M Lalmanzuala chuan an thil chhui naah diklo engmah a hmuh loh thu vawiin khan Aizawl Press Club-ah thuthar thehdarhtute a hrilh a.

Pu M Lalmanzuala chuan Mizoram sorkarin hemi chungchang chhui chiang tura a tih chhan chu candidate tling ve tura inngai khan an tlin chhan loh kha answer sheet a mark thaichhiat kha thupbo lo se, tling pha ve turah kan inngai an tihna a ni ber a ni a, amaherawhchu hemi chungchangah hian thil diklo a awm lo a ni a ti.

MPSC in tihdan phung an nei tawh a, evaluator no 1 in an chhanna a en a, hetah hian mark a lo pek kha, no 2 in a en leh dawn khan correcting fluid a thaireh a ni a, hei hi complain awm chhan ber chu a nih hmel a ti a, hetah hian mark hi a hmuh theih vek tho avangin mark an hmuh zat hi tihdanglam a ni miah lo a, diklo a awm lo a ni a ti.

ACF lak tur chungchangah pawh a thiam leh qualification nei tha te, qualification kha recruitment rules ah a awm miao loh avangin tun tumah hian lak a ni ta lo ni a a hmuh thu a sawi bawk a ni.

Vawiina press mite zawhna chhangin Pu M Lalmanzuala chuan MSSSB din duhlotu a ni a, a chhan chu India danpui kalh a nih vang a ni a ti a, MPSC in hna lak chungchangah kharsatna an nei lova, hei hi chu thenkhatin an duhsak zawngte thun nan an hman duh vang mai a ni a ti.

<><><>

#### ZORO TO ORGANISE PEACEFUL RALLY AT ZOKHAWTHAR & VAPHAI

Zo Re-unification Organisation (ZORO) chuan tun thla ni 16 hian Zokhawthar leh Vaphai khuaah India sorkarin India leh Burma ramri hung a tum duhlohna leh Free Movement Regime (FMR) thiah a tum duhlohna lantir nan Peaceful Rally huaihawt an tum.

He thu hi vawiin khan Aizawl Press Club-ah chanchinbumite hmaah ZORO chuan an puang a. ZORO chuan Zofate chu an duh vang hi loin British sorkarin barhluih ramri a siamsak tih sawiin insuihkhawma pumkhata awm leh an inbeisei laia ramri hung tuma hmalak a ni chu an hriatthiam loh thu an sawi a.

Zofate, ram pathum India, Burma leh Bangladesh-a an duh vang ni loa thendarh te chu hnam khat then hran an nih avangin India sorkar chuan passport ngai loin ramri atanga km 16 chhunga chengte Free Movement Regime hmanga intlawhpawh tawn a phalsak thu sawiin hei hi India sorkar chuan hnawk tiin thiah tumin hma a la tan mek tih an sawi a. FMR thiah a nih chuan unau thlahkhat thenhrana an awm dawn thu leh, nupui pasal lo inneih pawlh tawh an nih anga kawppui then tur pawh thahnem tak an awm dawn thu an sawi a. FMR thiah a nih loh nan ZORO chuan hma a la chhunzawm zel dawn tih an sawi a. Peaceful Rally an neih tur chu thlawp tur leh telpui turin Mizoram mipuite an sawm a ni.

<><><>

#### KOLASIB

Vawiin khan Kolasib District Mizo Indigenous Games, Inter Branch Competition chu tan a ni

He hun hi Kolasib Hmarveng Khelmualah tan a ni a, Kolasib Bawrhsap Pu John LT Sanga chuan ahawng a He hun hi Pu T. Siana, Producer, Mizo Indigenous Games 2024 leh Programme Executive, DDK, Aizawl chuan kaihhruiin Pu John LT Sanga chuan, Indigenous People tih chuan ram leilung lo luah hmasatute a kawh thu sawiin, khawvel ram hrang hrangah chutiang chu hmuh tur an awm a tih thu leh, chung Indigenous te chuan zia rang an nei a, chu chu humhalh a ngaih thu a sawi a. United Nations pawhin Indigenous te chu a ngaihsakin an infiamna, an lam leh an culture te humhalh turin a ti a ni, a ti.

Pu Lalhruiatluanga, President, Mizoram Indigenous Games Association, Hqrs. Aizawl pawhin thu sawiin, MIGA din a nih dan te, Mizoram State Sports Council hnuaiah pawh an inziahluh thute a sawi a. District hrang hrangah MIGA hi din an duh thute sawiin, District 4 ah chiah an la din thu a sawi bakah Mizo infiamna chu a neituten chawisan zel a tul thu sawiin, Mizo hnam infiamna chu changkan san mai lo a, chawinung tura theih tawp chhuah a tul thu a sawi bawk.

<><><>

### LOK SABHA CAMPAIGN IN FULL SWING

Lok Sabha inthlan thawh lina atana campaign in a vawrtawp a thleng chho tan a. Karleh thawhtanni May ni 13 ah vote thlak a ni ang. Inthlan thawh linaah hian Lok Sabha seat 96 ah vote thlak tur a ni a. State 10 leh UT pakhat ah inthlan buatsaih tur niin candidate 1717 an awm a ni.

Inthlan thawh linaa tel tur Telangana ah chuan political party hrang hrang hruaitute theitawp chhuahin an tang a. BJP Senior leader leh Union Minister Amit Shah chuan vawiin khan Bhongir Lok Sabha bialah hun a hmang a. Congress hruaitu Rahul Gandhi pawhin Telangana-ah vek hian Narsapur-a Jana Jata Sabha ah thu a sawi a. Hei bakah hian Hyderabad khawdaia Saroor Nagar-ah a campaign bawk a ni.

BRS hotupa leh Chief Minister hlui K Chandrasekhar Rao pawhin vawiin khan Karimnagar-ah hun a hmang a ni.

Hetihlai hian Lok Sabha inthlanpui thawh nganaah Candidate 695 an awm dawn a. Tun thla ni 20 ah vote thlak a ni ang. Inthlan thawhngana hi state 6 leh Union Territory pahniha Parliamentary Constituency 49 ah buatsaih a ni dawn a. Nomination 1586 thehluh thehluh ni a. Tun thla ni 3 thleng kha hun hawn niin a tukah endik a ni a, nomination 749 pawm a ni.

Inthlan thawh nganna neihna turte hi Uttar Pradesh ah seat 14, Maharashtra ah 13, West Bengal ah 7, Bihar leh Odisha ah 5, Jharkhand ah 3 leh Jammu and Kashmir leh Ladakh ah pakhat ve ve te a ni.

Vawiin hi Lok Sabha inthlan thawhrukna chuh tumte tana inhnudawh theih hun tawp ni a ni bawk a. Inthlan thawhruknaah hian Parliamentary Constituency 57 ah inthlan a ni dawn a. Tun thla ni 25 ah State paruk leh UT pakhat ah vote thlak a ni ang.

<><><>

### PRESIDENT TO CONFER PADMA AWARD

President Draupadi Murmu-i chuan zaninah civil mite chawimawina Padma Award a sem dawn. Delhi-a President chenna Rashtrapati Bhavan-ah Padma Award sem inkhawm hi neih a ni dawn a ni.

Padma Award hi chhawng thumah then a ni a. Chawimawina sang ber hi Padma Vibhushan a ni a, Padma Bhushan leh Padma Shri ten an dawt a ni. Heng award te hi ramchunga civil mi kawng hrang hranga mi hmingtha leh chawimawi tlakte hnenah hlan thin a nia. Kumtinin Republic Day-ah Padma Award dawng turte hi puanzar thin a ni a.

Tun tum Padma award dawng tur zingah hian Mizoram atangin Thutak Nunpuitu Team TNT dintu leh enkawltu Dr. Sangthankima chu Padma Shri dawng tura thlan a ni.

Thla hmasa April ni 22 khan President hian Padma Vibhushan pathum, Padma Bhushan pariat leh Padma Shri 55 a lo sem tawh a ni.

<><><>